

四庫全書

史部

欽定四庫全書

史部
元史卷五十一

御史^臣徐如澍覆勘

總校官編修臣朱鈐

欽定四庫全書

元史卷五十一

明翰林學士臣中大夫制誥魚修國史宋濂等修

志第三十

五行二

水不潤下

元統元年五月汴梁陽武縣河溢害稼六月京畿大霖
雨水平地丈餘涇河溢關中水災黃河大溢河南水災

泉州霖雨溪水暴漲漂民居數百家七月潮州屬縣大水二年正月東平須城縣濟南濟州曹州濟陰縣水災二月灤河漆河溢永平路屬縣皆水瑞州路水三月山東霖雨水湧四月東平益都水五月鎮江路水宣德府大水六月淮河漲漂山陽縣境內民畜房舍九月吉安路水至元元年河決汴梁封丘縣二年五月南陽鄧州大水六月涇水溢八月大都至通州霖雨大水三年二月紹興大水五月廣西賀州大水害稼六月衛輝淫雨

至七月丹沁二河泛漲與城西御河通流平地深二丈
餘漂沒人民房舍田禾甚衆民皆棲於樹木郡守僧嘉
努以舟載飯食之移老弱居城頭日給糧餉月餘水方
退汴梁蘭陽尉氏二縣歸德府皆河水泛溢黃州及蘄
州常山縣皆大水四年五月吉安永豐縣大水六月邵
武大水城市皆洪流漂沿溪民居殆盡五年五月庚戌
汀州路長汀縣大水平地深三丈許損民居八百家壞
民田二百頃溺死者八千餘人七月沂州沂沭二河暴

漲決隄防害田稼邵武光澤縣大水常州宜興縣山水
出勢高一丈壞民居六年二月京畿五州十一縣及福
州路福寧州大水五月甲子慶元奉化州山崩水湧出
平地溺死人甚衆六月衢州西安龍游二縣大水庚戌
處州松陽龍泉二縣積雨水漲入城中深丈餘溺死五
百餘人遂昌縣尤甚平地三丈餘桃源鄉山崩壓溺民
居五十三家死者三百六十餘人七月壬子延平南平
縣淫雨水泛漲溺死百餘人損民居三百餘家壞民田

二頃七十餘畝乙卯奉元路盤屋縣河水溢漂溺居民
八月甲午衛輝大水漂民居一千餘家十月河南府宜
陽縣大水漂民居溺死者衆至正元年汴梁鈞州大水
揚州路崇明通泰等州海潮湧溢溺死一千六百餘人
二年四月睢州儀封縣大水害稼六月癸丑夜濟南山
水暴漲衝東西二關流入小清河黑山天麻石固等寨
及臥龍山水通流入大清河漂沒上下民居千餘家溺
死者無筭三年二月鞏昌寧遠伏羌成紀三縣山崩水

湧溺死者無筭五月黃河決白茅口七月汴梁中牟扶
溝尉氏洧川四縣鄭州滎陽汜水河陰三縣大水四年
五月霸州大水六月河南鞏縣大雨伊洛水溢漂民居
數百家濟寧路兗州汴梁鄆陵通許陳留臨潁等縣大
水害稼人相食七月灤河水溢出平地丈餘永平路禾
稼廬舍漂沒甚衆東平路東阿陽穀汶上平陰四縣衝
州西安縣大水温州颶風大作海水溢漂民居溺死者
甚衆五年七月河決濟陰漂官民亭舍殆盡十月黃河

泛溢七年五月黃州大水八月壬午杭州上海浦中午潮退而復至八年正月辛亥河決陷濟寧路四月平江松江大水五月庚子廣西山崩水湧灘江溢平地水深二丈餘屋宇人畜漂沒壬子寶慶大水乙卯錢塘江潮比之八月中高數丈餘沿河民皆遷居以避之六月己丑中興路松滋縣驟雨水暴漲平地深丈有五尺餘漂沒六十餘里死者一千五百人是月膠州大水七月高密縣大水九年七月中興路公安石首潛江監利等縣

及沔陽府大水夏秋蘄州大水傷稼十年五月龍興瑞
州大水六月乙未霍州靈巖縣雨水暴漲決隄堰漂民
居甚衆七月汾州平遙縣汾水溢靜江荔浦縣大水害
稼十一年夏龍興南昌新建二縣大水安慶桐城縣雨
水泛漲花崖龍源二山崩衝決縣東大河漂民居四百
餘家七月冀寧路平晉文水二縣大水汾河汎溢東西
兩岸漂沒田禾數百頃河決歸德府永城縣壞黃陵岡
岸靜江路大水決南北二隄渠十二年六月中興路松

滋縣驟雨水暴漲漂民居千餘家溺死七百人七月衢
州西安縣大水十三年夏薊州豐潤玉田遵化平谷四
縣大水七月丁卯泉州海水日三潮十四年六月河南
府鞏縣大雨伊洛水溢漂沒民居溺死三百餘人秋薊
州大水十五年六月荊州大水十六年河決鄭州河陰
縣官署民居盡廢遂成中流山東大水十七年六月暑
雨漳河溢廣平郡邑皆水秋薊州四縣皆大水十八年
秋京師及薊州廣東惠州廣西四縣賀州皆大水十九

年九月濟州任城縣河決二十年七月通州大水二十二年三月邵武光澤縣大水二十三年孟州濟源溫縣水七月河決東平壽張縣圯城墻漂屋廬人溺死甚衆二十四年三月益都縣井水溢而黃懷慶路孟州河內武陟縣水七月益都路壽光縣膠州高密縣水二十五年秋薊州大水東平須城東阿平陰三縣河決小流口達于清河壞民居傷禾稼二十六年二月河北徙上自東明曹濮下及濟寧皆被其害六月河南府大霖雨瀍

水溢深四丈許漂東關居民數百家秋七月汾州介休縣汾水溢薊州四縣衛輝汴梁鈞州大水害稼八月棣州大清河決濱棣二州之界民居漂流無遺濟寧路肥城縣西黃水汎溢漂没田禾民居百有餘里德州齊河縣境七十餘里亦如之

至正二十年十一月汴梁原武滎澤二縣黃河清三日二十一年十一月河南孟津縣至絳州垣曲縣二百里河清七日新安縣亦如之十二月冀寧路石州河水清

至明年春冰泮始如故二十四年夏衛輝路黃河清

至正六年九月彰德雨雪結凍如琉璃七年八月衛輝

隕霜殺稼九年三月溫州大雪十年春彰德大寒近清

明節雨雪三尺民多凍餒而死十一年三月汴梁路鈞

州大雷雨雪密縣平地雪深三尺餘十三年秋邵武光

澤縣隕霜殺稼二十三年三月東平路須城東阿陽穀

三縣隕霜殺桑廢蠶事八月鈞州密縣隕霜殺菽二十

七年三月彰德大雪寒甚於冬民多凍死五月辛巳大

同隕霜殺麥秋莫寧路徐溝介休二縣雨雪十二月奉
元路咸寧縣井水冰二十八年四月奉元隕霜殺菽

元統元年三月戊子紹興蕭山縣大風雨雹拔木仆屋
殺麻麥斃傷人民二年二月甲子塞北東涼亭雨雹至
元元年七月西和州徽州雨雹二年八月甲戌朔高郵
寶應縣大雨雹是時江浙皆旱唯本縣瀕河田禾成熟
可刈悉為雹所害凡田之旱者無一雹及之四年四月
癸巳清州八里塘雨雹大過於拳其狀有如龜者有如

小兒形者有如獅象者有如環玦者或橢如卵或圓如彈玲瓏有竅色白而堅長老云大者固常見之未有奇狀若是也至正二年五月東平路東阿縣雨雹大者如馬首三年六月東平陽穀縣雨雹六年二月辛未興國路雨雹大如馬首小者如鷄子斃禽畜甚衆五月辛卯絳州雨雹大者二尺餘八年四月庚辰鈞州密縣雨雹大如鷄子傷麥禾龍興奉新縣大雨雹傷禾折木八月己卯孟都臨淄縣雨雹大如孟孟野無青草赤地如赭

九年二月龍興大雨電十年五月汾州平遙縣雨電十
一年四月乙巳彰德雨電大者如斧時麥熟將刈頃刻
亡失田疇堅如築場無稽粒遺留者地廣三十里長百
有餘里樹木皆如斧所劈傷行人斃禽畜甚衆五月癸
丑文水縣雨電十三年四月並都高苑縣雨電傷麥禾
及桑十四年六月薊州雨電十七年四月濟南大風雨
電十九年四月莒州蒙陰縣雨電五月通州及並都臨
朐縣雨電害稼二十年五月薊州遵化縣雨電終日二

十一年五月東平雨雹害稼二十二年八月南雄雨雹如桃李實二十三年五月鄜州宜君縣雨雹大如鷄子損豆麥七月京師及隰州永和縣大雨雹害稼二十五年五月東昌聊城縣雨雹大如拳小者如鷄子二麥不登二十六年六月汾州平遙縣雨雹二十七年二月乙丑永州城中晝晦鷄棲于埽人舉燈而食既而大雨雹逾時方明五月益都大雷雨雹七月冀寧徐溝縣大風雨雹拔木害稼二十八年六月慶陽府雨雹大如盂小

者如彈丸平地厚尺餘殺苗稼斃禽獸

至正三年秋興國路永興縣雷擊死糧房貼書尹章于
縣治時方大旱有朱書在其背云有旱却言無旱無災
却道有災未庸殲厥渠魁且擊庭前小吏七年五月庚
戌台州路黃巖州海濱無雲而雷冬衛輝路天鼓鳴十
年六月戊申廣西臨桂縣無雲而雷震死邑民廖廣達
十二月庚子汾州孝義縣雷雨十一年十二月台州大
雨震電十二年三月丙午寧國路無雲而雷十三年十

二月庚戌京師無雲而雷少頃有火墜於東南懷慶路
河內縣及河南府天鼓鳴于西北是日懷慶之修武潞
州之襄垣縣皆無雲而雷聲震天地是月汾州雷雨十
四年十二月孝義縣雷雨十九年十二月台州大雷電
二十一年十一月戊申温州樂清縣雷二十七年正月
乙未夜晉寧路絳州天鼓鳴空中如聞戰鬪之聲十月
奉元路雷電

至正二十五年六月戊申京師大雨有魚隨雨而落長

尺許人取而食之

至元五年六月庚戌汀州長汀縣山蛟出大雨驟至平地湧水深三丈餘漂沒民居八百餘家壞田二百餘頃至正十七年六月癸酉温州有龍鬬于樂清江中颶風大作所至有光如毬死者萬餘人八月癸丑祥符縣西北有青白二龍見若相鬬之勢良久而散二十三年正月甲辰廣西貴州江中有物登岼蛇首四足而青色長四尺許軍民聚觀而殺之二十四年六月保德州有黃

龍見於咸寧井中二十七年六月丁巳皇太子寢殿新
甃井成有龍自井而出光焰爍人宮人震懾仆地又宮
牆外長慶寺所掌咸宗鄂爾多內大槐樹有龍纏繞其
上良久飛去樹皮皆剝七月益都臨朐縣有龍見於龍
山巨石重千斤浮空而起二十八年十一月大同路懷
仁縣河岸崩有蛇大小相綰結可載數車

至正三年秋建寧浦城縣民家豕生豚二尾八足十五
年鎮江民家豕生豚如象形二十四年正月保德州民

家豕生豚一首二身八蹄二尾至元元年正月廣西師
宗州步生妻適和一產三男汴梁祥符縣市中一乞丐
婦人忽生髭鬚至正九年四月棗陽民張氏婦生男甫
及周歲長四尺許容貌異常顴腹擁腫見人輒嬉笑如
世俗所畫布袋和尚云二十三年五月霸州民王馬駒
妻趙氏一產三男六月亳家務李閨妻張氏一產三男
至正元年四月戊寅彰德有赤風自西北來忽變為黑
晝晦如夜十三年冬袁州路每日暮有黑氣環遶郡城

十七年正月己丑杭州降黑雨河池水皆黑二十八年七月乙亥京師黑霧昏暝不辨人物自旦近午始消如是者旬有五日

火不炎上

元統元年六月甲申杭州火至正元年四月辛卯台州火乙未杭州火燔官舍民居公廨寺觀凡一萬五千七百餘間死者七十有四人二年四月杭州又火六年八月己巳延平路火燔官舍民居八百餘區死者五十人十

年興國路自春及夏城中火災不絕日數十起二十年
惠州路城中火災屢見二十三年正月乙卯夜廣西貴
州火同知州事韓特穆爾布哈判官高萬章及家人九
口俱死居民死者三百餘人牛五十頭馬九匹公署倉
庫案牘焚燒皆盡二十八年二月癸卯京師武器庫災
已巳陝西有飛火自華山下流入張良弼營中焚兵庫
器仗六月甲寅大都大聖壽萬安寺災是日未時雷雨
中有火自空而下其殿脊東鰲魚口火焰出佛身上亦

火起帝聞之泣下亟命百官救護唯東西二影堂神主及寶玩器物得免餘皆焚燬此寺舊名白塔自世祖以來為百官習儀之所其殿陞闡楯一如內庭之制成宗時置世祖影堂於殿之西裕宗影堂于殿之東月遣大臣致祭

至元六年冬京師無雪至正八年九月奉元路桃花花十四年八月冀寧路榆次縣桃李花十五年十一月汾州介休縣桃花十七年十一月汾州桃花

至正十一年十月衢州東北雨米如黍十一月建寧浦
城縣雨黑子如稗實邵武大雨震電雨黑黍如蘆稗信
州雨黑黍鄱陽縣雨菽豆郡邑多有民皆取而食之十
六年六月彰德路葦葉順次倚疊而生自編成若旗幟
上尖葉聚粘如檣民謠云葦生成旗民皆流離葦生成
檣殺伐遭殃又有黍自生成文紅稻黑字其上節云天
下太平其下節云天下刀兵十八年處州山谷中小竹
結實如小麥饑民采食之二十一年明州象山縣竹穗

生實如小米可食

至正十一年廣西慶遠府有異禽雙飛見於述昆鄉飛鳥千百隨之蓋鳳凰云其一飛去其一留止者為獐人射死首長尺許毛羽五色有藏之以獻於帥府者久而其色鮮明如生云五月興國有大鳥百餘飛至郡西白朗山顛狀如人立去而復至者數次十九年京師鴟鵂夜鳴達旦連月乃止有杜鵑啼於城中居庸關亦如之二十七年三月丁丑朔萊州招遠縣大社里黑風大起

有大鳥自南飛至其色蒼白展翅如席狀類鶴俄頃飛去遺下粟黍稻麥黃黑豆蕎麥於張家屋上約數升許是歲大稔

元統二年正月庚寅朔河南省雨血是日衆官晨集忽聞燭柴烟氣既而黑霧四塞咫尺不辨腥穢逼人逾時方息及行禮畢日過午驟雨隨至霑灑墜墻及裳衣皆赤至元四年四月辛未京師雨紅沙晝晦至正五年四月鎮江丹陽縣雨紅霧草木葉及行人裳衣皆濡成紅

色十三年三月丙戌彰德路西南有火自天而下如在
城外覓之無有十二月庚戌潞州襄垣縣有火墜於東
南十四年衛輝路有天光見於西方十二月辛卯絳州
有紅氣起自北方蔽天幾半移時方散十五年春薊州
雨血十八年三月辛丑夜大同路有黑氣蔽於西方聲
如雷然俄頃有雲如火交射中天遍地俱見火光以物
觸地輒有火起至夜半空中如有兵戈相擊之聲二十
一年七月己巳冀寧路忻州西北有赤氣蔽空如血逾

時方散八月壬午棣州夜半有赤風亘天起西北至於東北癸未彰德西北夜有紅氣亘天至明方息乙酉大同路北方夜有赤氣蔽天直過天庭自東而西移時方散如是者三十月癸巳昧爽絳州有紅氣見於北方如火二十三年三月壬戌大同路夜有赤氣亘天中侵北斗六月丁巳絳州日暮有紅光見於北方如火中有黑氣相雜又有白虹二直衝北斗逾時方散庚申晉寧路北方日暮天赤中有白氣如虹者三一貫北斗一貫北

極一貫天潢至夜分方滅八月丙辰忻州東北夜有赤
氣亘天中有白色如蛇形徐徐而行逾時方散十月丙
申朔大名路向青齊一方有赤氣照耀千里二十四年
九月癸酉冀寧平晉縣西北方至夜天紅半壁有頃從
東而散二十八年六月壬寅彰德路天寧寺塔忽變紅
色自頂至踵表裏透徹如煨鐵初出於爐頂上有光焰
迸發自二更至五更乃止癸卯甲辰亦如之先是河北
有童謠云塔兒黑北人作主南人客塔兒紅朱衣人作

主人公七月癸酉京師赤氣滿天如火照人自寅至辰
氣燄方息

至元元年十二月芝草生於荊門州當陽縣覆船山一
本五幹高尺有二寸一本二幹高五寸有半幹皆兩岐
二本相依附扶疎瑰奇如珊瑚枝其高者結為華蓋廣
雲之狀五年秋芝草生於中書工部之屋梁一本七幹
木不曲直

至元五年十一月癸酉瑞州路新昌州雨木冰至明年

二月壬寅冰始解至正四年正月汴梁路鄭州尉氏洧
川河陰三縣及龍興靖安縣雨木冰十一月東平雨木
冰十二年九月壬午冀寧保德州雨木冰十四年冬龍
興雨木冰二十五年二月辛亥汴梁雨木冰狀如樓閣
人物冠帶鳥獸花卉百態具備羽幢珠葆彌望不絕凡
五日始解

至正三年夏上都大都桑果葉皆有黃色龍文九年秋
奉元桃杏實十二年五月汴梁祥符縣椿樹結實如木

瓜十六年七月彰德李樹結實如小黃瓜民謠云李生黃瓜民皆無家二十一年明州松樹結實其大有盈尺者八月汴梁祥符縣邑中樹木一夕皆有濕泥塗之

至元二年五月乙卯南陽鄧州大霖雨自是日至於六月甲申乃止三年六月衛輝路淫雨至正二年秋彰德路霖雨三年四月至七月汴梁路滎澤縣鈞州新鄭密縣霖雨害稼四年夏汴梁蘭陽縣許州長葛鄆城襄城睢州歸德府亳州之鹿邑濟寧之虞城淫雨害蠶麥禾

皆不登八月益都霖雨饑民有相食者五年夏秋汴梁
祥符尉氏洧川鄭州鈞州亳州久雨害稼二麥禾豆俱
不登河間路淫雨妨害鹽課八年五月京師大霖雨都
城崩圯鈞州新鄭縣淫雨害麥九年七月高唐州大霖
雨壞官署民居歸德府淫雨決十旬十年二月彰德路
大雨害麥二十年七月益都高苑縣陝州隄池縣大雨
害稼二十三年七月懷慶路河內修武武陟三縣及孟
州淫雨害稼二十四年秋密州安丘縣大雨二十五年

秋密州安丘縣潞州汴梁許州及鈞州之密縣淫雨害稼二十七年秋彰德路淫雨

至正六年八月龍興進賢縣甘露降二十年十月國子學大成殿松柏樹有甘露降其上

至正十年春麗正門樓斗拱內有人伏其中不知何自而至遠近聚觀之門尉以白留守達於都堂上聞有旨令取付法司鞫問但云薊州人問其姓名詰其所從來皆惘若無知唯妄言禍福而已乃以不應之罪笞之忽

不知所在

至正二十年八月慶陽延安寧安等州野鼠食稼初由
鵝卵化生既成牝牡生育日滋百畝之田一夕俱盡二
十六年泗州瀕淮兩岨有灰黑色鼠暮夜出穴成羣覆
地食禾

金不從革

至正十年正月甲戌棣州白晝空中有聲自西北而來
距州二十里隕於地化為石其色黑微有金星散布其

上有司以進遂藏之司天監十一月冬至夜陝西耀州
有星墜於西原光耀燭地聲如雷鳴者三化為石形如
斧一面如鐵一面如錫削之有屑擊之有聲十六年冬
十一月大名路大名縣有星如火自東南流尾如曳筭
墜入於地化為石青黑光瑩狀如狗頭其斷處類新割
者有司以進太史驗視云天狗也命藏於庫十九年四
月己丑建寧路甌寧縣有星墜於營山前其聲如雷化
為石二十三年六月庚戌並都臨朐縣龍山有星墜入

於地掘之深五尺得石如磚褐色上有星如銀破碎不完

至正九年龍興靖安縣山石迸裂湧水人多死者十年三月慶元奉化州南山石笑開其碎而大者有山川人物禽鳥草木之文二十七年六月丁卯沂州東蒼山有巨石大如屋崩裂墜地聲震如雷七月丙戌廣西靈川縣臨江石崖崩

元統元年夏紹興旱自四月不雨至於七月淮東淮西

皆旱二年三月湖廣旱自是月不雨至於八月四月河
南旱自是月不雨至於八月秋南康旱至元元年夏河
南及邵武大旱二年蘄州黃州浙東衢州婺州紹興江
東信州江西瑞州等路及陝西皆旱是年四月黃州黃
岡縣周氏婦產一男即死狗頭人身咸以為旱魃云六
年夏廣東南雄路旱自二月不雨至於五月種不入土
至正二年彰德大同二郡及冀寧平晉榆次徐溝縣汾
州孝義縣沂州皆大旱自春至秋不雨人有相食者秋

衛輝大旱三年秋興國大旱四年福州大旱自三月不
雨至於八月興化邵武鎮江及湖南之桂陽皆旱五年
曹州禹城縣大旱夏膠州高密縣旱六年鎮江及慶元
奉化州旱七年懷慶衛輝河東及鳳翔之岐山汴梁之
祥符河南之孟津皆大旱八年三月並都臨淄縣大旱
五月四川旱十年夏秋彰德旱十一年鎮江旱十二年
蘄州黃州大旱人相食浙東紹興旱台州自四月不雨
至於七月十三年蘄州黃岡及浙東慶元衢州婺州江

東饒州江西龍興瑞州建昌吉安廣東南雄湖南永州
桂陽皆大旱十四年懷慶河內縣孟州汴梁祥符縣福
建泉州湖南永州寶慶廣西梧州皆大旱祥符旱魃再
見泉州種不入土人相食十五年衛輝大旱十六年婺
州處州皆大旱十八年春薊州旱莒州濱州般陽滋川
縣霍州鄜州鳳翔岐山縣春夏皆大旱莒州家人自相
食岐山人相食十九年晉寧鳳翔廣西梧州象州皆大
旱二十年通州早汾州介休縣自四月至秋不雨廣西

賓州大旱自閏五月不雨至於八月二十二年河南洛陽孟津偃師三縣大旱人相食二十三年山東濟南廣西賀州皆大旱

至元五年八月京師童謠云白雁望南飛馬札望北跳至正五年淮楚間童謠云富漢莫起樓窮漢莫起屋但看羊兒年便是吳家國十年河南北童謠云石人一雙眼挑動黃河天下反十五年京師童謠云一陣黃風一陣沙千里萬里無人家回頭雪消不堪看三眼和尚弄

瞎馬此皆詩妖也至元三年郡邑皆相傳朝廷欲括童男女於是市井鄉里競相嫁娶倉卒成言貧富長幼多不得其宜者此民訛也

至正十年彰德境內狼狽為害夜如人形入人家哭就人懷抱中取小兒食之二十三年正月福州連江縣有虎入於縣治二十四年七月福州白晝獲虎於城西

至元二年七月黃州蝗三年六月懷慶溫州汴梁陽武縣蝗五年七月膠州即墨縣蝗至正四年歸德府永城

縣及亳州蝗十七年東昌荏平縣蝗十八年夏薊州遼
州濰州昌邑縣膠州高密縣蝗秋大都廣平順德及濰
州之北海莒州之蒙陰汴梁之陳留歸德之永城皆蝗
順德九縣民食蝗廣平人相食十九年大都霸州通州
真定彰德懷慶東昌衛輝河間之臨邑東平之須城東
阿陽穀三縣山東益都臨淄二縣濰州膠州博興州大
同冀寧二郡文水榆次壽陽徐溝四縣忻汾二州及孝
義平遙介休二縣晉寧潞州及壺關潞城襄垣三縣霍

州趙城靈石二縣隰之永和沁之武鄉遼之榆社奉元
及汴梁之祥符原武鄆陵扶溝杞尉氏洧川七縣鄭之
滎陽汜水許之長葛鄆城襄城臨潁鈞之新鄭密縣皆
蝗食禾稼草木俱盡所至蔽日礙人馬不能行填坑塹
皆盈饑民捕蝗以為食或曝乾而積之又罄則人相食
七月淮安清河縣飛蝗蔽天自西北來凡經七日禾稼
俱盡二十年並都臨朐壽光二縣鳳翔岐山縣蝗二十
一年六月河南鞏縣蝗食稼俱盡七月衛輝及汴梁滎

澤縣鄭州蝗二十二年秋衛輝及汴梁開封扶溝洧川
三縣許州及鈞之新鄭密二縣蝗二十五年鳳翔岐山
縣蝗

元統二年六月彰德雨白毛俗呼云老君髯民謠曰天
雨霓事不齊至元三年三月彰德雨毛如線而綠俗呼
云菩薩線民謠云天雨線民起怨中原地事必變六年
七月延安路鄜州雨白毛如馬髯所屬邑亦如之至正
十三年四月冀寧榆次縣雨白毛如馬髯七月泉州路

雨白絲十八年五月益都雨白霓十九年三月遵化路連日雨霓二十五年五月甲子京師雨霓長尺許如馬鬃二十七年五月益都雨白霓

至元四年八月丁丑京師白虹亘天至正二十二年京師有白氣如小索起危宿長五百丈掃太微二十四年六月癸卯翼寧路保德州三星晝見有白氣橫突其中二十六年三月丁亥白虹五道亘天其第三道貫日又氣橫貫東南良久乃滅二十七年五月大名路有白氣

二道二十八年閏七月乙丑冀寧文水縣有白虹貫日
自東北直遶西南雲影中似日非日如鏡者三色青白
逾時方沒

稼穡不成

元統元年夏兩淮大饑二年春淮西饑七月池州饑十
一月濟南萊蕪縣饑至元元年春益都路沂水日照蒙
陰莒四縣及龍興路饑夏京師饑是歲沅州道州寶慶
及邵武建寧饑二年順州及淮西安豐浙西松江浙東

台州江西江撫袁瑞湖北沅州盧陽縣饑三年大都及
濟南蘄州杭州平江紹興溧陽瑞州臨江饑五年上都
開平縣桓州興和寶昌州濮州之鄆城其寧之交城益
都之膠密莒濰四州遼東瀋陽路湖南衡州江西袁州
八番順元等處皆饑六年順德之邢臺濟南之歷城大
名之元城德州之清平泰安之奉符長清淮安之山陽
等縣歸德邳州益都般陽處州婺州四郡皆饑至正元
年春京畿州縣真定河間濟南及湖南饑夏彰德及溫

州饑二年保德州大饑三年衛輝冀寧忻州大饑人相
食四年霸州大饑人相食東平路東阿陽穀汶上平陰
四縣皆大饑冬保定河南饑五年春東平路須城東阿
陽穀三縣及徐州大饑人相食夏濟南汴梁河南邠州
瑞州溫州邵武饑六年五月陝西饑七年彰德懷慶東
平東昌晉寧等處饑九年春膠州大饑人相食鈞州新
鄭密縣饑十四年春浙東台州江東饒閩海福州邵武
汀州江西龍興建昌吉安臨江廣西靜江等郡皆大饑

人相食十七年河南大饑十八年春莒州蒙陰縣大饑
斗米金一斤冬京師大饑人相食彰德山東亦如之十
九年正月至五月京師大饑銀一錠得米僅八斗死者
無筭通州民劉五殺其子而食之保定路草死盈道軍
士掠孱弱以為食濟南及並都之高苑莒之蒙陰河南
之孟津新安甌池等縣皆大饑人相食二十一年霸州
饑民多草死

至正四年福州邵武延平汀州四郡夏秋大疫五年春

夏濟南大疫十二年正月翼寧保德州大疫夏龍興大
疫十三年黃州饒州大疫十二月大同路大疫十六年
春河南大疫十七年六月莒州蒙陰縣大疫十八年夏
汾州大疫十九年春夏鄜州并原縣莒州沂水日照二
縣及廣東南雄路大疫二十年夏紹興山陰會稽二縣
大疫二十二年又大疫

至正元年七月廣西雷州颶風大作湧潮水拔木害稼
二年十月海州颶風作海水漲溺死人民十三年五月

乙丑潯州颶風大作壞官舍民居屋瓦門扉皆飄揚七
里之外十四年七月甲子潯州襄垣縣大風拔木偃禾
二十一年正月癸酉石州大風拔木六畜皆鳴人持槍
矛忽生火焰抹之即無搖之即有二十四年台州路黃
巖州海溢颶風拔木禾盡偃二十七年三月庚子京師
有大風起自西北飛砂揚礫昏塵蔽天逾時風勢八面
俱至終夜不止如是者連日自後每日寅時風起萬竅
爭鳴戌時方息至五月癸未乃止

至正三年六月梧州青蟲食稼十年七月全州蟲食稼
郡守石亨祖禱于玄妙觀寒雨三日蟲盡死十九年五
月濟南章丘鄒平二縣蝻五穀不登二十二年春衛輝
路螟六月萊州膠水縣蚱蜢生七月掖縣蚱蜢生害稼
二十三年六月寧海文登縣蚱蜢生七月萊州招遠萊
陽二縣及登州寧海州蚱蜢生

至正九年三月陳州楊家莊上牛生黃犢火光滿室麻
頂綠角間生綠毛不食乳二日而死十年秋襄陽車城

民家牛生犢五足前三後二十六年春汴梁祥符縣牛
生犢雙首不及二日死二十八年五月東昌聊城縣錢
鎮撫家牛生黃犢六足前二後四

至元五年二月信州雨土至正三年三月至四月忻州
風霾晝晦二十六年四月乙丑奉元路黃霧四塞

元統元年八月鞏昌徽州山崩九月庚申秦州山崩十
月丙寅鳳州山崩十一月丙申鞏昌成紀縣地裂山崩
癸卯安慶潛山縣地震辛亥秦州地裂山崩十二月饒

州德興縣餘干樂平二州地震二年五月信州地震八月辛未京師地震鷄鳴山崩陷為池方百里人死者衆至元元年十一月壬寅興國路地震十二月丙子安慶路地震所屬宿松太湖潛山三縣同時俱震廬州蘄州黃州亦如是月饒州亦地震二年正月乙丑宿松地震五月壬申秦州山崩三年八月辛巳夜京師地震壬午又大震損太廟神主西湖寺神御殿壁傾祭器皆壞順州龍慶州及懷來縣皆以辛巳夜地震壞官民房舍

傷人及畜牧宣德府亦如之遂改為順寧云四年春保安州及瑞州路新昌州地震六月信州路靈山裂七月己酉保安州地大震丙辰鞏昌府山崩八月丙子京師地震日凡二三至乙酉乃止密州安丘縣地震六年六月己亥秦州成紀縣山崩地裂至正元年二月汴梁路地震二年四月辛丑冀寧路平晉縣地震聲如雷鳴裂地尺餘民居皆傾仆七月惠州雨水羅浮山崩凡二十七處壞民居塞田澗十二月己酉京師地震三年二月

鈞州新鄭密縣地震六月乙巳秦州奉安縣南坡崩裂
壑死人畜七月戊辰鞏昌山崩人畜死者衆十二月膠
州及屬邑高密地震四年八月莒州蒙陰縣地震十二
月東平路東阿陽穀平陰三縣及漢陽地震五年春薊
州地震所領四縣及東平汶上縣亦如之十二月乙丑
鎮江地震六年二月益都路益都昌樂壽光三縣濰州
北海縣膠州即墨縣地震三月高苑縣地震壞民居六
月廣州增城縣羅浮山崩水湧溢溺死百餘人九月戊

午邵武地震翌日地中有聲如鼓夜復如之七年二月
益都臨淄臨朐濰州之昌邑膠州之高密濟南之棣州
地震三月東平路東阿陽穀平陰三縣地震河水動搖
五月臨淄地又震七日乃止河東地圯泉湧崩城陷屋
傷人民十一月鎮江丹陽縣地震九年六月台州地震
七月庚寅泉州大風雨永春縣南象山崩壓死者甚衆
十年翼寧徐溝縣地震五月甲子龍興寧州大雨山崩
數十處丙寅瑞州上高縣蒙山崩十月乙酉泉州安溪

縣後山鳴十一年四月箕寧路汾忻二州文水平晉榆次壽陽四縣晉寧遼州之榆社懷慶河內修武二縣及孟州皆地震聲如雷霆圯房屋壓死者甚衆八月丁丑中興路公安松滋枝江三縣峽荆門二州地震十二年二月丙戌霍州靈石縣地震閏三月丁丑陝西地震莊浪定西靜寧會州尤甚移山湮谷陷沒廬舍有不見其跡者會州公廨墻圯得弩五百餘張長丈餘短者九尺人莫能開挽十月丙午霍州趙城縣霍山崩湧石數里

前三日山鳴如雷禽獸驚散十三年三月莊浪定西靜
寧會州地震七月份州白彪山圻十四年四月份州介
休縣地震泉湧七月孝義縣地震十一月寧國路地震
所領寧國旌德二縣亦如之淮安路海州地震十二月
己酉紹興地震十五年四月寧國敬亭麻姑華陽諸山
崩六月丁丑翼寧保德州地震十六年春薊州地震凡
十日所領四縣亦如之六月雷州地大震十七年十月
靜江路東門地陷城東石山崩十二月丁酉慶元路象

山縣鵝鼻山崩有聲如雷十八年二月乙亥翼寧臨州
地震五月益都地震十九年正月甲午慶元地震二十
年二月延平順昌縣地震二十二年三月南雄路地震
二十三年十二月丁巳台州地震二十五年十月壬申
興化路地震有聲如雷二十六年三月海州地震如雷
贛榆縣吳山崩六月汾州介休縣地震紹興山陰縣臥
龍山崩七月辛亥翼寧路徐溝縣石忻臨三州汾之孝
義平遙二縣同日地震有壓死者丙辰泉州同安縣大

雷雨三秀山崩是月河南府鞏縣大霖雨地震山崩十
一月辛丑華州蒲城縣洛岸崩壅水絕流三日十二月
庚午華州之蒲城縣洛水和順崖崩其崖戴石有巖穴
可居是日壓死辟亂者七十餘人二十七年五月山東
地震六月沂州山石崩裂有聲如雷七月丙戌靜江靈
川縣大藏山石崖崩十月丙辰福州雷雨地震十二月
庚午又震有聲如雷二十八年六月冀寧文水徐溝二
縣汾州孝義介休二縣臨州保德州隰之石樓縣及陝

西皆地震十月辛巳陝西地又震

至元四年五月彰德臨漳縣麥秀兩岐有三穗者至正
元年延平順昌縣嘉禾生一莖五穗翼寧太原縣有嘉
禾異畝同穎三年八月晉寧臨汾縣嘉禾生有五穗至
八穗者十三年彰德路穀麥雙穗十六年大同路秦城鄉
嘉禾生一莖二穗五穗有九穗者有異莖而同穗者二
十六年五月洛陽縣康家莊有瑞麥一莖四穗雙穗三
穗者甚衆

元史卷五十一

欽定四庫全書

元史卷五十二

明翰林學士亞中大夫知制誥纂修國史宋濂等修

志第四

歷一

夫明時治歷自黃帝堯舜與三代之盛王莫不重之其
文備見於傳記矣雖去古既遠其法不詳然原其要不
過隨時考驗以合於天而已漢劉歆作三統歷始立積

年日法以為推步之準後世因之歷唐而宋其更元改法者凡數十家豈故相為乖異哉蓋天有不齊之運而歷為一定之法所以既久而不能不差既差則不可不改也元初承用金大明歷庚辰歲太宗西征五月望月蝕不效二月五月朔微月見於西南中書令耶律楚材以大明歷後天乃損節氣之分減周天之秒去交終之率治月轉之餘課兩曜之後先調五行之出沒以正大明歷之失且以中元庚午歲國兵南伐而天下略定推

上元庚子歲天正十一月壬戌朔子正冬至日月合璧
五星聯珠同會虛宿六度以應太祖受命之行又以西
域中原地里殊遠創為里差以增損之雖東西萬里不
復差忒遂題其名曰西征庚午元歷表上之然不果頒
用至元四年西域扎瑪里鼎撰進萬年歷世祖稍頒行
之十三年平宋遂詔前中書左丞許衡太子贊善王恂
都水少監郭守敬改治新歷衡等以為金雖改歷止以
宋紀元歷徵加增益實未嘗測驗於天乃與南北日官

陳鼎臣鄧元麟毛鵬翼劉巨淵王素岳鉉高敬等叅改累代厯法復測候日月星辰消息運行之變叅別同異酌取中數以為厯法十七年冬至厯成詔賜名曰授時厯十八年頒行天下二十年詔太子諭德李謙為厯議發明新厯順天求合之微攷證前代人為附會之失誠可以貽之永久自古及今其推驗之精蓋未有出於此者也今衡忭守敬等所撰厯經及謙厯議故存皆可攷據是用具著于篇惟萬年厯不復傳而庚午元厯雖未

嘗頒用其為書猶在因附著于後使來者有考焉作為
志

授時厯議上

驗氣

天道運行如環無端治厯者必就陰消陽息之際以為
立法之始陰陽消息之機何從而見之惟候其日晷進
退則其機將無所遁候之之法不過植表測景以究其
氣至之始智作能述前代諸人為法略備苟能精思密

索心與理會則前人述作之外未必無所增益舊法擇地平行設水準繩墨植表其中以度其中晷然表短促尺寸之下所為分秒太半少之數未易分別表長則分寸稍長所不便者景虛而淡難得實景前人欲就虛景之中改求真實或設望筭或置小表或以木為規皆取表端日光下徹圭面今以銅為表高三十六尺端挾以二龍舉一橫梁下至圭面共四十尺是為八尺之表五圭表刻為尺寸舊寸一今申而為五釐毫差易分別創

為景符以取實景其制以銅葉博二寸長加博之二中穿一竅若針芥然以方閭為趺一端設為機軸今可開闔槓其一端使其勢斜倚北高南下往來遷就於虛景之中竅達日光僅如米許隱然見橫梁於其中舊法以表端測晷所得者日體上邊之景今以橫梁取之實得中景不容有毫末之差地中八尺表景冬至長一丈三尺有奇夏至尺有五寸今京師長表冬至之景七丈九尺八寸有奇在八尺表則一丈五尺九寸六分夏至之

景一丈一尺七寸有奇在八尺表則二尺三寸四分雖
晷景長短所在不同而其景長為冬至景短為夏至則
一也惟是氣至時刻攷求不易蓋至日氣正則一歲氣
節從而正矣劉宋祖沖之嘗取至前後二十三日間
晷景折取其中定為冬至且以日差比課推定時刻宋
皇祐間周琮則取立冬立春二日之景以為去至既遠
日差頗多易為推攷紀元以後諸歷為法加詳大抵不
出沖之之法新歷積日累月實測中晷自遠日以及近

日取前後日率相埒者叅攷同異初非偏取一二日之景以取數多者為定實減大明歷一十九刻二十分仍以累歲實測中晷日差分寸定擬二至時刻于後

推至元十四年丁丑歲冬至

其年十一月十四日己亥景長七丈九尺四寸八分五釐五毫至二十一日丙午景長七丈九尺五寸四分一釐二十二日丁未景長七丈九尺四寸五分五釐以己亥丁未二日之景相校餘三分五毫為晷差

進二位以丙午丁未二日之景相校餘八分六釐為
法除之得三十五刻用減相距日八百刻餘七百六
十五刻折取其中加半日刻共為四百三十二刻半
百約為日得四日餘以十二乘之百約為時得三時
滿五十又作一時共得四時餘以十二收之得三刻
命初起距日己亥算外得癸卯日辰初三刻為丁丑
歲冬至此取至前後四日景

十一月初九日甲午景七丈八尺六寸三分五釐五

毫至二十六日辛亥景七丈八尺七寸九分三釐五
毫二十七日壬子景七丈八尺五寸五分以甲午壬
子景相減復以辛亥壬子景相減準前法求之亦得
癸卯日辰初三刻至二十八日癸丑景七丈八尺三
寸四釐五毫用壬子癸丑二日之景與甲午景準前
法求之亦合此取至前後八九日景

十一月丙戌朔景七丈五尺九寸八分六釐五毫二
日丁亥景七丈六尺三寸七分七釐至十二月初六

日庚申景七丈五尺八寸五分一釐準前法求之亦
在辰初三刻此取至前後一十七日景十一月二十
一日丙午景七丈九寸七分一釐至十二月十六日
庚午景七丈七寸六分十七日辛未景七丈一寸五
分六釐五毫準前法求之亦得辰初三刻此取至前
後二十七日景

六月初五日癸亥景一丈三尺八分距十五年五月
癸未朔景一丈三尺三分八釐五毫初二日甲申景

一丈二尺九寸二分五毫準前法求之亦合此取至
前後一百六十日景

推十五年戊寅歲夏至

五月十九日辛丑景一丈一尺七寸七分七釐五毫
距二十八日庚戌景一丈一尺七寸八分二十九日
辛亥景一丈一尺八寸五釐五毫用辛丑庚戌二日
之景相減餘二釐五毫進二位為實復用庚戌辛亥
景相減餘二分五釐五毫為法除之得九刻用減相

距日九百刻餘八百九十一刻半之加半日刻百約
得四日餘以十二乘之百約得十一時餘以十二收
為刻得三刻命初起距日辛丑算外得乙巳日亥正
三刻夏至此取至前後四日景

十四年十二月十五日己巳景七丈一尺三寸四分
三釐距十五年十一月初二日辛巳景七丈七寸五
分九釐五毫初三日壬午景七丈一尺四寸六釐用
己巳壬午景相減以辛巳壬午景相減除之亦合此

用至前後一百五十六日景

十四年十二月十二日丙寅景七丈二尺九寸七分
二釐五毫十三日丁卯景七丈二尺四寸五分四釐
五毫十四日戊辰景七丈一尺九寸九釐距十五年
十一月初四日癸未景七丈一尺九寸五分七釐五
毫初五日甲申景七丈二尺五寸五釐初六日乙酉
景七丈三尺三分三釐五毫前後互取所得時刻皆
合此取至前後一百五十八九日景

十四年十二月初七日辛酉景七丈五尺四寸一分
七釐初八日壬戌景七丈四尺九寸五分九釐五毫
初九日癸亥景七丈四尺四寸八分六釐距十五年
十一月初九日戊子景七丈四尺五寸二分五毫初
十日己丑景七丈五尺三釐五毫十一日庚寅景七
丈五尺四寸四分九釐五毫以壬戌己丑景相減為
實以辛酉壬戌景相減為法除之或以壬戌癸亥景
相減或以戊子己丑景相減若己丑庚寅景相減推

前法求之皆合此取至前後一百六十三日景

推十五年戊寅歲冬至

其年十一月十九日戊戌景七丈八尺三寸一分八釐五毫距閏十一月初九日戊午景七丈八尺二寸六分三釐五毫初十日己未景七丈八尺八分二釐五毫用戊戌戊午二日景相減餘四分五釐為晷差進二位以戊午己未景相減餘二寸八分一釐為法除之得一十六刻加相距日二千刻半之加半日刻

百約得十日餘以十二乘之百約為時滿五十又進
一時共得七時餘以十二收為刻命初起距日己亥
算外得戊申日未初三刻為戊寅歲冬至此取至前
後十日景

十一月十二日辛卯景七丈五尺八寸八分一釐五
毫十三日壬辰景七丈六尺三寸一釐五毫閏十一
月十五日甲子景七丈六尺三寸六分六釐五毫十
六日乙丑景七丈五尺九寸五分三釐十七日丙寅

景七丈五尺五寸四釐五毫用壬辰甲子景相減為
實以辛卯壬辰景相減為法除之亦得戊申日未初
三刻或用甲子乙丑景相減推之亦合若用辛卯乙
丑景相減為實用乙丑丙寅景相減除之並同此取
至前後十六七日景

十一月初八日丁亥景七丈四尺三分七釐五毫閏
十一月二十日己巳景七丈四尺一寸二分二十一
日庚午景七丈三尺六寸一分四釐五毫用丁亥己

已景相減為實以己巳庚午景相減除之亦同此取
至前後二十一日景

六月二十六日戊寅景一丈四尺四寸五分二釐五
毫二十七日己卯景一丈四尺六寸三分八釐至十
六年四月初二日戊寅景一丈四尺四寸八分一釐
以二戊寅景相減用後戊寅己卯景相減推之亦同
此取至前後一百五十日景

五月二十八日庚戌景一丈一尺七寸八分至十六

年四月二十九日乙巳景一丈一尺八寸六分三釐
三十日丙午景一丈一尺七寸八分三釐用庚戌丙
午景相減以乙巳丙午景相減推之亦同此取至前
後一百七十八日景

推十六年己卯歲夏至

四月十九日乙未景一丈二尺三寸六分九釐五毫
二十日丙申景一丈二尺二寸九分三釐五毫至五
月十九日乙丑景一丈二尺二寸六分四釐以丙申

乙丑景相減餘二分九釐五毫為晷差進二位以乙未丙申景相減得七分六釐為法除之得三十八刻加相距日二千九百刻半之加半日刻百約得十五日餘以十二乘之百約得二時餘以十二收之得二刻命初起距日丙申算外得辛亥日寅正二刻為夏至此取至前後十五日景

三月二十一日戊辰景一丈六尺三寸九分五毫六月十六日壬辰景一丈六尺九分九釐五毫十七日

癸巳景一丈六尺三寸一分一釐用戊辰癸巳景相減以壬辰癸巳景相減準前法推之亦合此取至前後四十二日景

三月初二日己酉景二丈一尺三寸五釐至七月初七日壬子景二丈一尺一寸九分五釐五毫初八日癸丑景二丈一尺四寸八分六釐五毫用己酉壬子景相減以壬子癸丑景相減如前法推之亦合此取至前後六十一二日景

三月戊申朔景二丈一尺六寸一分一釐至七月初
八日癸丑景二丈一尺四寸八分六釐五毫初九日
甲寅景二丈一尺九寸一分五釐五毫用戊申癸丑
景相減以癸丑甲寅景相減準前法推之亦同此取
至前後六十二三日景

二月十八日乙未景二丈六尺三分四釐五毫至七
月二十一日丙寅景二丈五尺八寸九分九釐二十
二日丁卯景二丈六尺二寸五分九釐用乙未丙寅

景相減以丙寅丁卯景相減如前法推之亦同此取
至前後七十五六日景

二月三日庚辰景三丈二尺一寸九分五釐五毫至
八月初五日庚辰景三丈一尺五寸九分六釐五毫
初六日辛巳景三丈二尺二分六釐五毫用前庚辰
與辛巳景相減以後庚辰辛巳景相減如前推之亦
同此取至前後九十日景

正月十九日丁卯景三丈八尺五寸一釐五毫至八

月十八日癸巳景三丈七尺八寸二分三釐十九日
甲午景三丈八尺三寸一分五毫用丁卯甲午景相
減以癸巳甲午景相校如前推之亦同此取至前後
一百三十四日景

推十六年己卯歲冬至

十月二十四日戊戌景七丈六尺七寸四分至十一
月二十五日己巳景七丈六尺五寸八分二十六日
庚午景七丈六尺一寸四分二釐五毫用戊戌己巳

景相減餘一寸六分為晷差進二位以己巳庚午景
相減餘四寸三分七釐五毫為法除之得三十六刻
以相減距日三千一百刻餘三千六十四刻半之加
五十刻百約得一十五日餘以十二乘之百約為時
滿五十又進一時共得十時餘以十二收之為刻得
二刻命初起距日戌戌算外得癸丑日戌初二刻冬
至此取至前後十五六日景

十月十八日壬辰景七丈四尺五分二釐五毫十九

日癸巳景七丈四尺五寸四分五釐二十日甲午景
七丈五尺二分五釐至十一月二十八日壬申景七
丈五尺三寸二分二十九日癸酉景七丈四尺八寸
五分二釐五毫十二月甲戌朔景七丈四尺三寸六
分五釐初二日乙亥景七丈三尺八寸七分一釐五
毫用甲午癸酉景相減癸巳甲午景相減如前推之
亦同若以壬申癸酉景相減為法推之亦同此取至
前後十八日景

若用癸巳與甲戌景相減以壬辰癸巳景相減推之
或癸巳甲午景相減推之或用甲戌癸酉景相減推
之或甲戌乙亥景相減推之或以壬辰乙亥景相減
用壬辰癸巳景相減推之並同此取至前後二十日
景

十月十六日庚寅景七丈三尺一分五釐十二月初
三日丙子景七丈三尺三寸二分初四日丁丑景七
丈二尺八寸四分二釐五毫用庚寅丁丑景相減以

丙子丁丑景相減推之亦同此取至前後二十三日
景

十月十四日戊子景七丈一尺九寸二分二釐五毫
十五日己丑景七丈二尺四寸六分九釐十二月初
五日戊寅景七丈二尺二寸七分二釐五毫用己丑
戊寅景相減以戊子己丑景相減推之或用己丑庚
寅相減推之亦同此取至前後二十四日景

十月初七日辛巳景六丈七尺七寸四分五釐初八

日壬午景六丈八尺三寸七分二釐五毫初九
日癸未景六丈八尺九寸七分七釐五毫十二月十
二日乙酉景六丈八尺一寸四分五釐用壬午乙酉
景相減以辛巳壬午相減推之壬午癸未景相減推
之亦同此取至前後三十一二日景

十月乙亥朔景六丈三尺八寸七分十二月十八日
辛卯景六丈四尺二寸九分七釐五毫十九日壬辰
景六丈三尺六寸二分五釐用乙亥壬辰景相減以

辛卯壬辰景相減推之亦同此取至前後三十八日
景

九月二十二日丙寅景五丈七尺八寸二分五釐十
二月二十八日辛丑景五丈七尺五寸八分二十九
日壬寅景五丈六尺九寸一分五釐用丙寅辛丑景
相減以辛丑壬寅景相減推之亦同此取至前後四
十七八日景

九月二十日甲子景五丈六尺四寸九分二釐五毫

至十二月二十九日壬寅景五丈六尺九寸一分五釐至十七年正月癸卯朔景五丈六尺二寸五分用甲子癸卯相減壬寅癸卯景相減推之亦同此取至前後五十日景

右以累年推測到冬夏二至時刻為準定擬至元十八年辛巳歲前冬至當在己未日夜半後六刻即丑初一刻

歲餘歲差

周天之度周歲之日皆三百六十有五全策之外
又有奇分大率皆四分之一自今歲冬至距來歲
冬至歷三百六十五日而日行一周凡四周歷千
四百六十則餘一日折而四之則四分之一也然
天之分常有餘歲之分常不足其數有不能齊者
惟其所差至微前人初未覺知迨漢末劉洪始覺
冬至後天謂歲周餘分太强乃作乾象歷減歲餘
分二千五百為二千四百六十二至晉虞喜宋何

承天祖沖之謂歲當有差因立歲差之法其法損
歲餘益天周使歲餘浸弱天周浸強強弱相減因
得日躔歲退之差歲餘天周二者實相為用歲差
由斯而立日躔由斯而得一或損益失當詎能與
天叶哉今自劉宋大明壬寅以來凡測景驗氣得
冬至時刻真數者有六取相距積日時刻以相距
之年除之各得其時所用歲餘復自大明壬寅距
至元戊寅積日時刻以相距之年除之得每歲三

百六十五日二十四分二十五秒比大明厯減去
一十一秒定為方今所用歲餘餘七十五秒用益
所謂四分之一共為三百六十五度二十五分
七十五秒定為天周餘分強弱相減餘一分五十
秒用除全度得六十六年有奇日却一度以六十
六年除全度適得一分五十秒定為歲差復以堯
典中星攷之其時冬至日在女虛之交及考之前
史漢元和二年冬至日在斗二十一度晉太元九

年退在斗十七度宋元嘉十年在斗十四度末梁
大同十年在斗十二度隋開皇十八年猶在斗十
二度唐開元十二年在斗九度半今退在箕十度
取其距今之年距今之度較之多者七十餘年少
者不下五十年輒差一度宋慶元間改統天厯取
太衍歲差率八十二年及開元所距之差五十五
年折取其中得六十七年為日却行一度之差施
之今日質諸天道實為密近然古今厯法合於今

必不能通於古密於古必不能驗於今今授時歷以之攷古則增歲餘而損歲差以之推來則增歲差而損歲餘上推春秋以來冬至往往皆合下求方來可以永久而無弊止密於今日而已仍以大衍等六歷攷驗春秋以來冬至疎密凡四十九事具列如後

冬至刻

大衍 宣明 紀元 統天 大明 授時

獻公十五年戊寅歲正月甲寅朔旦冬至

丙辰

二十

乙卯

八十

丁巳

三十

乙卯

二十

丁巳

三十

甲寅

九十

僖公五年丙寅歲正月辛亥朔旦冬至

辛亥

九十

辛亥

六十

壬子

七十

辛亥

二十

壬子

八十

辛亥

十四

昭公二十年己卯歲正月己丑朔旦冬至

己丑

四十

己丑

二十

庚寅

二十

戊子

九十

庚寅

二十

戊子

八十

宋元嘉十二年乙亥歲十一月十五日戊辰景長

戊辰

三十

戊辰

三十

戊辰

三十

戊辰

五十

戊辰

四十

戊辰

四十

七

元嘉十三年丙子歲十一月二十六日甲戌景長

癸酉

五十九

癸酉

五十七

癸酉

六十三

癸酉

七十五

癸酉

六十五

癸酉

七十一

元嘉十五年戊辰歲十一月十八日甲申景長

甲申

八

甲申

十六

甲申

二十二

甲申

二十四

甲申

三十

甲申

三十四

三十九

元嘉十六年己卯歲十月二十九日己丑景長

己丑

三十三

己丑

三十七

己丑

四十三

己丑

四十八

己丑

五十四

己丑

六十

六十四

元嘉十七年庚辰歲十一月初十日甲午景長

甲午

五十七

甲午

五十五

甲午

六十一

甲午

六十七

甲午

七十三

甲午

七十九

八十五

元嘉十八年辛巳歲十一月二十一日己亥景長

己亥

二十

己亥

三十

己亥

四十

己亥

五十

己亥

六十

己亥

七十

元嘉十九年壬午歲十一月初三日乙巳景長

乙巳

六十

乙巳

七十

乙巳

八十

乙巳

九十

乙巳

一百

乙巳

一百一十

大明五年辛丑歲十一月乙酉冬至

甲申

七十

甲申

八十

甲申

九十

甲申

一百

甲申

一百一十

甲申

一百二十

陳天嘉六年乙酉歲十一月庚寅景長

庚寅

十三

庚寅

二十四

庚寅

三十五

庚寅

四十六

庚寅

五十七

庚寅

六十八

光緒二年戊子歲十一月乙巳景長

乙巳_{八十} 乙巳_{八十} 乙巳_{七十} 乙巳_{九十} 乙巳_{八十} 乙巳_{九十}

太建四年壬辰歲十一月二十九日丁卯景長

丙寅_{三十} 丙寅_{八十} 丙寅_{七十} 丙寅_{九十} 丙寅_{八十} 丙寅_{七十}

太建六年甲午歲十一月二十日丁丑景長

丁丑_{三十} 丁丑_{三十} 丁丑_{二十} 丁丑_{四十} 丁丑_{三十} 丁丑_{三十}

太建九年丁酉歲十一月二十三日壬辰景長

癸巳_{四十} 癸巳_{六十} 壬辰_{九十} 癸巳_{十六} 癸巳_空 癸巳_八

太建十年戊戌歲十一月五日戊戌景長

戊戌_三 戊戌_三 戊戌_三 戊戌_四 戊戌_三

隋開皇四年甲辰歲十一月十一日己巳景長

己巳_七 己巳_八 己巳_九 己巳_六 己巳_一 己巳_六

開皇五年乙巳歲十一月二十二日乙亥景長

乙亥_一 乙亥_二 甲戌_九 乙亥_十 甲戌_五 乙亥_十

開皇六年丙午歲十一月三日庚辰景長

庚辰_五 庚辰_六 庚辰_{十八} 庚辰_四 庚辰_{十九} 庚辰_四

開皇七年丁未歲十一月十四日乙酉景長

乙酉^五 乙酉^一 乙酉^四 乙酉^九 乙酉^四 乙酉^九

開皇十一年辛亥歲十一月二十八日丙午景長

丙午^四 丙午^九 丙午^四 丙午^七 丙午^一 丙午^六

開皇十四年甲寅歲十一月辛酉朔旦冬至

壬戌^一 壬戌^二 壬戌^三 壬戌^四 壬戌^九

唐貞觀十八年甲辰歲十一月乙酉景長

甲申^三 甲申^五 甲申^一 甲申^五 甲申^二 甲申^四

貞觀二十三年己酉歲十一月辛亥景長

庚戌

卒五

庚戌

卒八

庚戌

卒三

庚戌

卒七

庚戌

卒四

庚戌

卒六

龍朔二年壬戌歲十一月四日己未至戊午景長

戊午

卒三

戊午

卒六

戊午

卒九

戊午

卒五

戊午

卒一

戊午

卒八

儀鳳元年丙子歲十一月壬申景長

壬申

卒五

壬申

卒八

壬申

卒二

壬申

卒八

壬申

卒十二

壬申

卒二

永淳元年壬午歲十一月癸卯景長

癸卯

卒七

癸卯

卒七

癸卯

卒七

癸卯

卒六

癸卯

卒八

癸卯

卒六

開元十年壬戌歲十一月癸酉景長

癸酉^九 癸酉^四 癸酉^一 癸酉^五 癸酉^二 癸酉^六

開元十一年癸亥歲十一月戊寅景長

戊寅^四 戊寅^八 戊寅^五 戊寅^四 戊寅^六 戊寅^七

開元十二年甲子歲十一月癸未冬至

癸未^八 甲申^三 癸未^八 癸未^九 癸未^一 癸未^九

宋景德四年丁未歲十一月戊辰日南至

戊辰^{十五} 戊辰^六 戊辰^四 丁卯^二 丁卯^四 丁卯^八

皇祐二年庚寅歲十一月三十日癸丑景長

癸丑

六

癸丑

七

癸丑

二

癸丑

五

癸丑

二

癸丑

三

元豐六年癸亥歲十一月丙午景長

丙午

七

丙午

八

丙午

二

丙午

七

丙午

六

丙午

二

元豐七年甲子歲十一月辛亥景長

辛亥

九

壬子

二

辛亥

五

辛亥

一

辛亥

五

辛亥

一

元祐三年戊辰歲十一月壬申景長

壬申

九

癸酉

八

壬申

四

壬申

八

壬申

四

壬申

八

元祐四年己巳歲十一月丁丑景長

戊寅^{十九} 戊寅^{三十} 丁丑^{七十} 丁丑^{七十} 丁丑^{七十} 丁丑^{七十}

元祐五年庚午歲十一月壬午冬至

癸未^{四十} 癸未^{五十} 壬午^{九十} 壬午^{九十} 壬午^{九十} 壬午^{九十}

元祐七年壬申歲十一月癸巳冬至

癸巳^{九十} 甲午^五 癸巳^{四十} 癸巳^{四十} 癸巳^{四十} 癸巳^{四十}

元符元年戊寅歲十一月甲子冬至

乙丑^{三十} 乙丑^{五十} 甲子^{九十} 甲子^{九十} 甲子^{九十} 甲子^{九十}

崇寧三年甲申歲十一月丙申冬至

丙申

六十

丙申

九十

丙申

三十

丙申

六十

丙申

三十

丙申

七十

紹熙二年辛亥歲十一月壬申冬至

癸酉

三十二

癸酉

七

壬申

五十二

壬申

四十七

壬申

五十七

壬申

六十四

慶元三年丁巳歲十一月癸卯日南至

甲辰

五十九

甲辰

七十四

甲辰

三

癸卯

九十二

甲辰

三

癸卯

九十二

嘉泰三年癸亥歲十一月甲戌日南至

丙子

五

丙子

二十

乙亥

四十九

乙亥

三十七

乙亥

四十九

乙亥

三十七

嘉定五年壬申歲十一月壬戌日南至

癸亥

二十

癸亥

四十

壬戌

六十

壬戌

八十

壬戌

六十

壬戌

六十

紹定三年庚寅歲十一月丙申日南至

丁酉

六十

丁酉

八十

丁酉

七十

丙申

六十

丁酉

七十

丙申

九十

淳祐十年庚戌歲十一月辛巳日南至

壬午

九十

壬午

七十

辛巳

九十

辛巳

七十

辛巳

九十

辛巳

八十

本朝至元十七年庚辰歲十一月己未夜半後六刻冬

至

己未

七

庚申

己未

五

己未

四

己未

四

己未

六

右自春秋獻公以來凡二千一百六十餘年用大衍宣
明紀元統天大明授時六歷推算冬至凡四十九事大
衍歷合者三十二不合者十七宣明歷合者二十六不
合者二十三紀元歷合者三十五不合者十四統天歷
合者三十八不合者十一大明歷合者三十四不合者
十五授時歷合者三十九不合者十事今案獻公十五
年戊寅歲正月甲寅朔旦冬至授時歷得甲寅統天歷

得己卯後天一日至僖公五年丙寅歲正月辛亥朔旦
冬至授時統天皆得辛亥與天合下至昭公二十年己
卯歲正月己丑朔旦冬至授時統天皆得戊子並先一
日若曲變其法以從之則獻僖皆不合矣可知春秋所
書昭公冬至乃日度失行之驗一也大衍歷攷古冬至
謂劉宋元嘉十三年丙子歲十一月甲戌日南至大衍
與皇極麟德三歷皆得癸酉各先一日乃日度失行非
三歷之差今以授時歷攷之亦得癸酉二也大明五年

辛丑歲十一月乙酉冬至諸厯皆得甲申殆亦日度之差三也陳太建四年壬辰歲十一月丁卯景長大衍授時皆得丙寅是先一日太建九年丁酉歲十一月壬辰景長大衍授時皆得癸巳是後一日一失之先一失之後若合於壬辰則差於丁酉合於丁酉則差於壬辰亦日度失行之驗五也隋開皇十一年辛亥歲十一月丙午景長大衍統天授時皆得丙午與天合至開皇十四年甲寅歲十一月辛酉冬至而大衍統天授時皆得壬

戌若合於辛亥則失於甲寅合於甲寅則失於辛亥其
開皇十四年甲寅歲冬至亦日度失行六也唐貞觀十
八年甲辰歲十一月乙酉景長諸厯得甲申貞觀二十
三年己酉歲十一月辛亥景長諸厯皆得庚戌大衍厯
議以永淳開元冬至推之知前二冬至乃史官依時厯
以書非候景所得所以不合今以授時厯攷之亦然八
也自前宋以來測景驗氣者凡十七事其景德丁未歲
戊辰日南至統天授時皆得丁卯是先一日嘉泰癸亥

歲甲戌日南至統天授時皆得乙亥是後一日一失之
先一失之後若曲變其數以從景德則其餘十六事多
後天從嘉泰則其餘十六事多先天亦日度失行之驗
十也前十事皆授時歷所不合以此理推之非不合矣
蓋類其同則知其中辨其異則知其變今於冬至略其
日度失行及史官依時歷書之者凡十事則授時歷三
十九事皆中統天歷與今歷不合者僅有獻公一事大
衍歷推獻公冬至後天二日大明後天三日授時歷與天

合下推至元庚辰冬至大衍後天八十一刻大明後天
一十九刻統天歷先天一刻授時歷與天合以前代諸
歷校之授時為密庶幾千歲之日至可坐而致云

古今歷叅校疎密

授時歷與古歷相校疎密自見蓋上能合於數百載之
前則下可行之永久此前人定說古稱善治歷者若宋
何承天隋劉焯唐傅仁均僧一行之流最為傑出今以
其歷與至元庚辰冬至氣應相校未有不舛戾者而以

新歷上推往古無不脗合則其疎密從可知已

宋文帝元嘉十九年壬午歲十一月乙巳日十一刻冬至距本朝至元十七年庚辰歲計八百三十八年其年十一月氣應己未六刻冬至元嘉歷推之得辛酉後授時二日授時上考元嘉壬午歲冬至得乙巳與元嘉合隋大業三年丁卯歲十一月庚午日五十二刻冬至距至元十七年庚辰歲計六百七十三年皇極歷推之得庚申冬至後授時一日授時上考大業丁卯歲冬至得

庚午與皇極合

唐武德元年戊寅歲十一月戊辰日六十四刻冬至距
至元十七年庚辰歲計六百六十二年戊寅厯推之得
庚申冬至後授時一日授時厯上考武德戊寅歲得戊
辰冬至與戊寅厯合

開元十五年丁卯歲十一月己亥日七十二刻冬至距
至元十七年庚辰歲計五百五十三年大衍厯推之得
己未冬至後授時八十一刻授時厯上考開元丁卯歲

得己亥冬至與大衍歷合先四刻

長慶元年辛丑歲十一月壬子日七十六刻冬至距至
元十七年庚辰歲計四百五十九年宣明歷推之得庚
申冬至後授時一日授時歷上考長慶辛丑歲得壬子
冬至與宣明歷合

宋太平興國五年庚辰歲十一月丙午日六十三刻冬
至距至元十七年庚辰歲計三百年乾元歷推之得庚
申冬至後授時一日授時歷上考太平興國庚辰歲得

丙午冬至與乾元合

咸平三年庚子歲十一月辛卯日五十三刻冬至距至
元十七年庚辰歲計二百八十年儀天厯推之得庚申
冬至後授時一日授時上考咸平庚子歲得辛卯冬至
與儀天合

崇寧四年乙酉歲十一月辛丑日六十一刻冬至距至
元十七年庚辰歲計一百七十五年紀元厯推之得己
未日冬至後授時十九刻授時厯上考崇寧乙酉歲得

辛丑日冬至與紀元厯合先二刻

金大定十九年己亥歲十一月己巳日六十四刻冬至
距至元十七年庚辰歲計一百一年大明厯推之得已

未冬至後授時一十九刻授時厯上考大定己亥歲得

己巳冬至與大明厯合先九刻

大明冬至蓋測
驗未密故也

慶元四年戊午歲十一月己酉日一十七刻冬至距至
元十七年庚辰歲計八十二年統天厯推之得己未冬
至先授時一刻授時厯上考慶元戊午歲得己酉日冬

至與統天厯合

周天列宿度

列宿著於天為舍二十有八為度三百六十五有奇非
日躔無以校其度非列舍無以紀其度周天之度因二
者以得之天體渾圓當二極南北之中絡以赤道日月
五星之行常出入於此天左旋日月五星邈而右轉昔
人厯象日月星辰謂此也然列舍相距度数厯代所測
不同非微有動移則前人所測或有未密古用闕管今

新制渾儀測用二綫所測度數分秒與前代不同者今
列於左

漢洛下閎所測 唐一行所測 宋皇祐所測 元豐所測 崇寧所測 至元所測
角十二度 十二度一十分

亢九度

九度少 九度二十分

氐十五度

十六度

十六度三十分

房五度

六度

五度太

五度六十分

心五度

六度

六度少

六度五十分

尾十八度

十九度

十九度少

十九度一十分

箕十一度

十度

十一度

十度半

十度四十分

東方七十五度

七十七度

七十九度

七十八度

七十九度二十分

斗二十六度及分

二十六度

二十五度

二十五度二十分

牛八度

七度

七度少

七度二十分

女十二度

十一度

十一度少

十一度三十五分

虛十度

十度少強

九度少強

八度九十五分

危十七度

十六度

十五度半

十五度四十分

室十六度 十六度 十七度

十七度十分

壁九度

八度太

八度六十分

枹九度及分 卒八度五十分 卒五度三十分 卒四度五十分 卒四度七十分 卒三度十分

奎十六度

十六度半

十六度六十分

婁十二度

十一度八十分

胃十四度

十五度

十五度六十分

昂十一度

十一度少

十一度三十分

畢十六度

十七度

十八度

十七度

十七度少

十七度四十分

甬二度 一度

半度 五分

參九度 十度

十度半 十一度一十分

西方八度 八十一度 八十三度 八十二度 八十三度 八十三度五分

井三十三度

三十三度少 三十三度三十分

鬼四度 三度

二度

二度半 二度二十分

柳十五度

十四度

十三度太 十三度三十分

星七度

六度太 六度三十分

張十八度

十七度 十七度少 十七度二十五分

翼十八度

十九度

十八度太

十度七五分

軫十七度

十七度三十分

零百十度一百十度一百十度一百十度一百度五分一百度四十分

日躔

日之麗天縣象最著大明一生列宿俱熄古人欲測躔度所在必以昏旦夜半中星衡考其所距從考其所當然昏旦夜半時刻未易得真時刻一差則所距所當不容無舛晉姜岌首以月食衡檢知日度所在紀元厯復

以太白誌其相距遠近於昏後明前驗定星度因得日
躔今用至元丁丑四月癸酉望月食既推求得冬至日
躔赤道箕宿十度黃道九度有奇仍自其年正月至己
卯歲終三年之間日測太陰所離宿次及歲星太白相
距度定驗參攷共得一百三十四事皆躔箕宿適與月
食所衝允合以金趙知微所修大明厯法推之冬至猶
躔斗初度三十六分六十四秒比新測實差七十六分
六十四秒

日行盈縮

日月之行有冬有夏言日月行度冬夏各不同也人徒知日行一度一歲一周天曾不知盈縮損益四序有不同者北齊張子信積候合蝕加時覺日行有入氣差然損益未得其正趙道嚴復準晷影長短定日行進退更造盈縮以求虧食至劉焯立躔度與四序升降雖損益不同後代祖述用之夫陰陽往來馴積而變冬至日行一度強出赤道二十四度弱自此日軌漸北積八十八

日九十一分當春分前三日交在赤道實行九十一度三十一分而適平自後其盈日損復行九十三日七十一分當夏至之日入赤道內二十四度弱實行九十一度三十一分日行一度弱向之盈分盡損而無餘自此日軌漸南積九十三日七十一分當秋分後三日交在赤道實行九十一度三十一分而復平自後其縮日損行八十八日九十一分出赤道外二十四度弱實行九十一度三十一分復當冬至向之縮分盡損而無餘盈

縮均有損益初為益末為損自冬至以及春分春分以
及夏至日躔自北陸轉而西西而南於盈為益益極而
損損至於無餘而縮自夏至以及秋分秋分以及冬至
日躔自南陸轉而東東而北於縮為益益極而損損至
於無餘而復盈盈初縮末俱八十八日九十一分而行
一象縮初盈末俱九十三日七十一分而行一象盈縮
極差皆二度四十分由實測晷景而得仍以算術推考
與所測允合

月行遲疾

古厯謂月平行十三度十九分度之一漢耿壽昌以為
日月行至牽牛東井日過度月行十五度至婁角始平
行赤道使然賈逵以為今合朔弦望月食加時所以不
中者蓋不知月行遲疾意李梵蘇統皆以月行當有遲
疾不必在牽牛東井婁角之間乃由行道有遠近出入
所生劉洪作乾象厯精思二十餘年始悟其理列為差
率以圓進退損益之數後之作厯者咸因之至唐一行

考九道委蛇曲折之數得月行疾徐之理先儒謂月與五星皆近日而疾遠日而遲歷家立法以入轉一周之日為遲疾二歷各立初末二限初為益末為損在疾初遲末其行度率過於平行遲初疾末率不及于平行自入轉初日行十四度半強從是漸殺歷七日適及平行度謂之疾初限其積度比平行餘五度四十二分自是其疾日損又歷七日行十二度微強向之益者盡損而無餘謂之疾末限自是復行遲度又歷七日適及平行

度謂之遲初限其積度比平行不及五度四十二分自此其遲日損行度漸增又歷七日復行十四度半強向之益者亦損而無餘謂之遲末限入轉一周實二十七日五十五刻四十六分遲疾極差皆五度四十二分舊歷日為一限皆用二十八限今定驗得轉分進退時各不同今分日為十二共三百三十六限半之為半周限析而四之為象限

白道交周

當二極南北之中橫絡天體以紀宿度者赤道也出入赤道為日行之軌者黃道也所謂白道與黃道交貫月行之所由也古人隨方立名分為八行與黃道而九究而言之其實一也惟其隨交遷徙變動不居故強以方色名之月道出入日道兩相交值當朔則日為月所掩當望則月為日所衝故皆有食然涉交有遠近食分有深淺皆可以數推之所謂交周者月道出入日道一周之日也日道距赤道之遠為度二十有四月道出入日

道不踰六度其距赤道也遠不過三十度近不下十八度出黃道外為陽入黃道內為陰陰陽一周分為四象月當黃道為正交出黃道外六度為半交復當黃道為中交入黃道內六度為半交是為四象象別七日各行九十一度四象周歷是謂一交之終以日計之得二十七日二十一刻二十二分二十四秒每一交退天一度二百分度之九十三凡二百四十九交退天一周有奇終而復始正交在春正半交出黃道外六度在赤道內

十八度正交在秋正半交出黃道外六度在赤道外三十度中交在春正半交入黃道內六度在赤道內三十度中交在秋正半交入黃道內六度在赤道外十八度月道與赤道正交距春秋二正黃赤道正交宿度東西不及十四度三分度之二夏至在陰歷內冬至在陽歷外月道與赤道所差者多夏至在陽歷外冬至在陰歷內月道與赤道所差者少蓋白道二交有斜有直陰陽二歷有內有外直者密而狹斜者疎而闊其差亦從而

異今立象置法求之差數多者不過三度五十分少者不下一度三十分是為月道與赤道多少之差

晝夜刻

日出為晝日入為夜晝夜一周共為百刻以十二辰分之每辰得八刻三刻之一無間南北所在皆同晝短則夜長夜短則晝長此自然之理也春秋二分日當赤道出入晝夜正等各五十刻自春分以及夏至日入赤道內去極浸近夜短而晝長自秋分以及冬至日出赤

道外去極浸遠晝短而夜長以地中揆之長不過六十刻短不過四十刻地中以南夏至去日出入之所為遠其長有不及六十刻者冬至去日出入之所為近其短有不止四十刻者地中以北夏至去日出入之所為近其長有不止六十刻者冬至去日出入之所為遠其短有不及四十刻者今京師冬至日出辰初二刻日入申正二刻故晝刻三十八夜刻六十二夏至日出寅正二刻日入戌初二刻故晝刻六十二夜刻三十八蓋地有

南北極有高下日入有早晏所以有不同耳今授時厯
晝夜刻一以京師為正其各所實測北極高下具見天
文志



元史卷五十二

元史卷五十二考證

授時歷議上十二月初六日庚申十一月二十一日丙

午 按原刻誤作戊申丙子今據支干改

推十六年己卯歲冬至十二月十二日乙酉 按原刻

誤作乙丑考上文十月初八日壬午初九日癸未計

至十二日應得乙酉下文用壬午乙酉景相減句原

刻誤同今併改

冬至刻隋開皇四年甲辰歲十一月十一日己巳景長

按原刻無隋字後又隋開皇十一年辛亥歲亦無
隋字今統據前後體例增

冬至刺僖公五年丙寅歲 按原刻無丙寅歲三字今
據前後體例增

古今歷叅校疎密授時歷上考大定己亥歲得己巳冬
至 按原刻脫得字今據文義及前後體例增